

que sa Majesté y enuoya le Capitaine-Iacque Quartier de Sainct mallo auquel il fist bailler & equipper pour c'est effect deux Nauires de Guerre par l'Admiral Chabor, avec lesquels s'y estant arrouté, descourrit encor plus auant, entra dans la grande riuere de Canada, laquelle depuis a esté appellée le grand fleuve Sainct Laurens, a mont lequel il alla iusque au grand sault, maintenant appellé Sainct Louys, descourrit plusieurs Ports, Caps, Terres, le Golphe de chaleur, Sagnay & plusieurs autres particulièrement remarquez au liure du sieur Champelain & aux relations des Peres Iesuittes qui y sont pour la foy Catholique, en quoy ils profitent grandement y faisans la fonction des Apostres, & y souffrans le martyre Chrestien & digne du nom qu'ils portent.

De sorte que le pays ayant esté recognu le Roy Iugea que la conqueste & habitude en estoit necessaire: non seulement pour y planter la Religion Catholique & les loix du Royaume: mais pour l'entretien de la Navigation & du commerce des François, sa maiesté y renuoya en l'an mil cinq cents quatre, lehan François de la Roche sieur de Robertual en qualité de Viceroy & Lieutenant General d'icelle; avec pouuoir & Commission d'y faire fortifier & bastir Havres & Chasteaux, conduire & mener Colonies Françoises, creer toutes sortes d'Offices & d'Officiers, tant pour la Iustice, que pour la Guerre, donner Loix, Polices & Reglements en l'un & en l'autre, dont il s'acquitta fort bien, en plusieurs voyages qu'il y fist, ou entr'autres il fortifia le Cap Breton & y establit plusieurs Loix, Polices & Reglements, donnant diuers noms François à plusieurs choses remarquables qui les y retiennent encor, & comme l'ayentendu de grand nombre de personnes qui y ont esté, & qui m'en ont fait raport comme ils y estoient obligez, mesme comme la laissé par escrit lehan de Biancourt sieur de Guillebert Mesnil Gentil-homme digne de Foy, eux-mesmes se fus-